

Bosna i Hercegovina
BRČKO DISTRIKT
BOSNE I HERCEGOVINE
Skupština Brčko distrikta



Босна и Херцеговина
БРЧКО ДИСТРИКТ
БОСНЕ И ХЕРЦЕГОВИНЕ
Скупштина Брчко дистрикта

Skupština Brčko distrikta Bosne i Hercegovine, na osnovu člana 22 Statuta Brčko distrikta Bosne i Hercegovine («Službeni glasnik Brčko distrikta BiH», br. 3/07) i člana 3 Zakona o javnim preduzećima u Brčko distriktu Bosne i Hercegovine («Službeni glasnik Brčko distrikta BiH», br. 15/06), na 51. sjednici održanoj 26. juna 2007. godine, donosi

ODLUKU

O OSNIVANJU JAVNOG PREDUZEĆA «KOMUNALNO BRČKO» D.O.O. BRČKO DISTRIKT BiH

DIO PRVI - OSNOVNE ODREDBE

Član 1

(Osnivanje preduzeća)

(1) Ovom odlukom osniva se Javno preduzeće za komunalne djelatnosti «Komunalno Brčko» d.o.o. Brčko distrikt BiH (u daljnjem tekstu: Preduzeće).

(2) Osnivač Preduzeća iz stava 1 ovog člana je Brčko distrikt Bosne i Hercegovine (u daljnjem tekstu: Distrikt), sa sjedištem u Brčkom, Bulevar mira broj 1.

Član 2

(Status Preduzeća)

Preduzeće iz člana 1 ove odluke je pravno lice, koje na teritoriji Distrikta obavlja djelatnosti od općeg interesa, u skladu s članom 2 Zakona o javnim preduzećima u Brčko distriktu Bosne i Hercegovine.

DIO DRUGI - ORGANI I RAD PREDUZEĆA

GLAVA I. NAZIV PREDUZEĆA

Član 3

(Naziv i sjedište)

(1) Preduzeće posluje pod nazivom: Javno preduzeće za komunalne djelatnosti «Komunalno Brčko» d.o.o. Brčko distrikt BiH.

(2) Skraćeni naziv Preduzeća glasi: JP «Komunalno Brčko» d.o.o. Brčko distrikt BiH.

(3) Sjedište Preduzeća je u Distriktu, ulica Studentska 13.

Član 4

(Vrijeme osnivanja)

Preduzeće se osniva na neodređeno vrijeme.

Član 5

(Pečat i štambilj)

(1) Preduzeće ima pečat oblika kruga u kome je koncentričnim krugovima ispisan, ćiriličnim i latiničnim pismom, puni naziv Preduzeća.

(2) Preduzeće ima štambilj oblika pravougaonika koji sadrži puni naziv Preduzeća, a služi za ovjeru prijema akata.

(3) U slučaju izrade više pečata i štambilja iste veličine, pečati i štambilji moraju biti istovjetni po sadržaju i svaki označen arapskim brojem.

(4) Veličinu pečata i štambilja, način upotrebe, čuvanje i broj pečata i štambilja utvrđuje se posebnim aktom, koji donosi direktor Preduzeća.

GLAVA II. DJELATNOST PREDUZEĆA

Član 6

(Djelatnosti od općeg interesa)

U skladu sa Zakonom o klasifikaciji djelatnosti u Brčko distriktu BiH («Službeni glasnik Brčko distrikta BiH», broj: 8/07), Preduzeće obavlja djelatnost od općeg interesa za Distrikt i to:

- a) **40.130** – Distribucija i prodaja električne energije;
- b) **41.000** – Sakupljanje, prečišćavanje i distribucija vode;
- c) **90.010** – Prikupljanje i obrada otpadnih voda;
- d) **90.020** – Prikupljanje i obrada ostalog otpada.

Član 7

(Ostale djelatnosti Preduzeća)

(1) Pored djelatnosti iz člana 6 ove odluke, Preduzeće može obavljati i druge djelatnosti koje služe registrovanim djelatnostima, djelatnosti: razvoja, projektovanja, izgradnje i održavanja tehničkih sistema, elektroenergetskih objekata i drugih objekata, vodovodne i kanalizacione mreže; razvoja i korištenja telekomunikacija, informativnu i naučnoistraživačku djelatnost u oblasti elektroprivrede i vodoprivrede; djelatnost geoloških istraživanja i druge djelatnosti za potrebe elektroprivrede, vodoprivrede i čistoće, koje su, u skladu s važećom klasifikacijom djelatnosti u Distriktu, utvrđene statutom Preduzeća.

(2) Preduzeće može obavljati i djelatnosti koje nisu upisane u sudski registar, pod uslovima određenim zakonom.

Član 8

(Promjena naziva, sjedišta i djelatnosti)

O promjeni naziva, sjedišta i djelatnosti Preduzeća odlučuje posebnim aktom upravni odbor Preduzeća, uz saglasnost Skupštine Distrikta.

GLAVA III. OSNIVAČKI KAPITAL

Član 9

(Osnivački kapital Preduzeća)

(1) Osnivački kapital Preduzeća u iznosu od 2.000,00 KM uplaćuje Distrikt na poseban račun otvoren kod banke, prije upisa osnivanja Preduzeća u sudski registar.

(2) Troškove osnivanja Preduzeća snosi Distrikt.

Član 10

(Povećanje i smanjenje kapitala)

(1) Osnivački kapital Preduzeća može se povećavati ili smanjivati.

(2) Smanjenje osnivačkog kapitala Preduzeća ne može se vršiti ispod iznosa minimalnog osnivačkog kapitala, koji je određen Zakonom.

Član 11

(Povećanje kapitala iz obaveznih rezervi)

Povećanje osnivačkog kapitala Preduzeća može se vršiti iz obaveznih rezervi Preduzeća ukoliko finansijski izvještaji i izvještaji revizora za posljednju poslovnu godinu pokazuju da Preduzeće nema nepokrivenih gubitaka.

Član 12

(Potraživanja i dugovanja)

Potraživanja i dugovanja Distrikta, Odjeljenja za komunalne poslove i Odjeljenja za javne poslove - Pododjeljenja za čistoću, u odnosu na Preduzeće, regulišu se posebnim aktom gradonačelnika Distrikta.

GLAVA IV. INFRASTRUKTURA

Član 13

(Infrastruktura od općeg interesa)

(1) Infrastrukturu od općeg interesa u Distriktu čine:

- a) elektroenergetski objekti putem kojih se distribuira električna energija;
- b) vodni objekti putem kojih se proizvodi, distribuira, odvodi i prečišćava voda;
- c) deponije.

(2) Infrastruktura od općeg interesa je u vlasništvu osnivača.

(3) Preduzeće je ovlašteno da koristi infrastrukturu od općeg interesa i njome upravlja, u skladu s posebnim aktom gradonačelnika Distrikta, čiji je sastavni dio izvještaj iz stava 6 ovog člana.

(4) Preduzeće je obavezno da infrastrukturu iz stava 3 ovog člana održava u stanju koje omogućava nesmetano pružanje usluga Preduzeća pri obavljanju djelatnosti od općeg interesa, kao i da održava ispravnost i funkcionalnost objekata koji čine infrastrukturu.

(5) Troškove održavanja infrastrukture od općeg interesa snosi Preduzeće.

(6) Izvještaj o popisu infrastrukture od općeg interesa sačinjava se sa stanjem na dan upisa osnivanja Preduzeća u sudski registar.

GLAVA V. RADNOPRAVNI STATUS

Član 14

(Preuzimanje zaposlenika)

Preduzeće preuzima zaposlenike Distrikta, koji su raspoređeni na radna mjesta u Odjeljenju za komunalne poslove i Odjeljenju za javne poslove - Pododjeljenju za

čistoću, u skladu s odlukom gradonačelnika Distrikta o preuzimanju zaposlenika Distrikta.

Član 15

(Unutrašnja organizacija i sistematizacija radnih mjesta)

(1) Unutrašnja organizacija Preduzeća, sistematizacija radnih mjesta i opis poslova i zadataka reguliše se posebnim općim aktom koji, na prijedlog direktora, donosi upravni odbor Preduzeća, uz saglasnost Skupštine Distrikta.

(2) Akt o unutrašnjoj organizaciji Preduzeća i sistematizaciji radnih mjesta donosi Preduzeće, u roku od 60 dana od dana upisa osnivanja Preduzeća u sudski registar, na osnovu potreba iskazanih u nalazu i mišljenju lica ovlaštenog za pružanje konsultantskih usluga.

GLAVA VI. UPRAVLJANJE

Član 16

(Organ upravljanja)

- (1) Upravni odbor upravlja Preduzećem.
- (2) Upravni odbor donosi poslovnik o svom radu.
- (3) Bliže odredbe o nadležnostima upravnog odbora Preduzeća uređuju se statutom Preduzeća.

Član 17

(Sastav upravnog odbora)

- Upravni odbor se sastoji od pet članova i to:
- a) dva člana, državna službenika zaposlena u Vladi Distrikta, uključujući i rukovodeće državne službenike koji posjeduju VSS i iskustvo u oblasti privrede i finansija;
 - b) tri člana, koja nisu zaposlena u Vladi Distrikta koji posjeduju VSS pravnog, ekonomskog ili tehničkog smjera i iskustvo u privredi.

Član 18

(Imenovanje upravnog odbora)

- (1) Gradonačelnik Distrikta imenuje upravni odbor u skladu s odredbama Zakona o javnim preduzećima u Brčko distriktu BiH.
- (2) Upravni odbor se imenuje na period od četiri godine, uz mogućnost ponovnog imenovanja.
- (3) Upravni odbor se imenuje u roku od 45 dana od dana osnivanja Preduzeća.

Član 19

(Zasjedanje upravnog odbora)

- (1) Upravni odbor zasjeda najmanje jednom mjesečno.
- (2) Sjednice upravnog odbora saziva i vodi predsjednik upravnog odbora.
- (3) Predsjednik upravnog odbora je odgovoran za:
 - a) redovno održavanje sjednica upravnog odbora;
 - b) pravovremeno obavljanje poslova utvrđenih Zakonom, aktom o osnivanju Preduzeća, statutom Preduzeća i drugim propisima.

- (4) O radu upravnog odbora vodi se zapisnik.
- (5) Sjednicama upravnog odbora prisustvuje direktor Preduzeća, a u odlučivanju upravnog odbora učestvuju samo članovi upravnog odbora.

Član 20

(Kvorum i glasanje)

- (1) Upravni odbor može punovažno odlučivati ako sjednici prisustvuje više od polovine ukupnog broja članova upravnog odbora.
- (2) Upravni odbor donosi odluke većinom glasova ukupnog broja članova.
- (3) Odluke upravnog odbora potpisuje predsjednik upravnog odbora.
- (4) Odluke upravnog odbora se objavljuju na način određen statutom Preduzeća.

GLAVA VII. RUKOVOĐENJE

Član 21

(Poslovodni organ)

- (1) Direktor predstavlja i zastupa Preduzeće.
- (2) Direktora imenuje upravni odbor Preduzeća, kroz javni konkurs, na period od četiri godine, uz mogućnost ponovnog imenovanja.
- (3) Direktor Preduzeća može u okviru svojih ovlaštenja dati drugom licu pismenu punomoć za zastupanje Preduzeća, samo uz saglasnost upravnog odbora Preduzeća.
- (4) Direktor Preduzeća ne može zaključivati ugovore čija stvarna ili procijenjena vrijednost prelazi 60.000,00 KM bez saglasnosti upravnog odbora Preduzeća.
- (5) Prava, obaveze i odgovornosti direktora bliže se uređuju statutom Preduzeća, drugim općim aktima Preduzeća i ugovorom između upravnog odbora i direktora.
- (6) Ovlaštenja direktora kao zastupnika Preduzeća, odnosno ograničenja njegovih ovlaštenja upisuju se u sudski registar.

Član 22

(Prokura)

- (1) Preduzeće može dati prokuru kao pismeno ovlaštenje za preduzimanje pravnih radnji u ime i za račun Preduzeća, u okviru djelatnosti Preduzeća, jednom ili većem broju lica.
- (2) Prokuru iz stava 1 ovog člana daje direktor Preduzeća, u okviru svoje nadležnosti, samo uz saglasnost upravnog odbora Preduzeća, s tim da se prokura ne može dati pravnom licu, niti se može dati prokura za otuđenje ili opterećenje nekretnina Preduzeća.
- (3) Prokurist ne može svoja ovlaštenja prenijeti na drugo lice.
- (4) Prokura može biti opozvana.
- (5) Prokura, koja ima naznačen rok ili datum prestanka, prestaje po isteku tog roka ili datuma.
- (6) Preduzeće je obavezno da prijavi upis u sudski registar davanje ili prestanak prokure.
- (7) Potpis prokurista se deponuje u sudskom registru.

(8) Pri potpisivanju u ime Preduzeća, prokurist je obavezan da koristi oblik potpisa koji je deponovan u sudskom registru, uz napomenu da je prokurist.

GLAVA VIII. OBAVEZNE REZERVE, DOBIT I GUBICI

Član 23

(Obavezne rezerve)

- (1) Preduzeće je dužno da formira obavezne rezerve Preduzeća.
- (2) Obavezne rezerve Preduzeća formiraju se od dobiti koju je Preduzeće ostvarilo prema godišnjem finansijskom izvještaju Preduzeća.
- (3) Preduzeće svake godine unosi u obavezne rezerve Preduzeća novčana sredstva u iznosu koji odredi upravni odbor Preduzeća.
- (4) U obavezne rezerve unosi se najmanje 5% od dobiti, dok obavezne rezerve ne dostignu srazmjeru prema osnovnom kapitalu u visini od 10% osnovnog kapitala.
- (5) Izdvajanje iz dobiti u obavezne rezerve prestaje nakon što se dostigne srazmjera prema osnovnom kapitalu, ali se izdvajanje odmah nastavlja ukoliko se obavezne rezerve Preduzeća smanje ispod propisanog iznosa.
- (6) Sredstva iz obaveznih rezervi koriste se za pokrivanje gubitaka Preduzeća, a za druge nepredviđene troškove obavezne rezerve mogu se koristiti samo uz saglasnost upravnog odbora Preduzeća.

Član 24

(Dobit i gubici)

- (1) Dobit preduzeća pripada Preduzeću.
- (2) O načinu raspoređivanja dobiti Preduzeća odlučuje upravni odbor Preduzeća.
- (3) Gubitak koji ostvari Preduzeće pokriva se iz obaveznih rezervi Preduzeća, kao i na drugi način predviđen Zakonom.

GLAVA IX. FINANSIRANJE I CJENOVNIK

Član 25

(Izvori i način finansiranja)

- (1) Preduzeće se finansira iz slijedećih izvora:
 - a) prihoda od obavljanja djelatnosti Preduzeća;
 - b) budžeta Distrikta i
 - c) drugih izvora.
- (2) Sredstva iz budžeta Distrikta se obezbjeđuju u skladu s poslovnim planom, koji donosi upravni odbor Preduzeća, uz saglasnost Skupštine Distrikta.

Član 26

(Cjenovnik)

Do donošenja cjenovnika za robe i usluge koje pruža Preduzeće, od strane nadležnog organa, primjenjivat će se cjenovnik koji je na snazi u vrijeme osnivanja Preduzeća.

GLAVA X. OPĆI AKTI

Član 27

(Opći akti i tumačenje)

- (1) Opći akti Preduzeća su:
 - a) statut;
 - b) poslovnik;
 - c) odluke upravnog odbora i direktora Preduzeća, kojima se na opći način uređuju određena pitanja ili odnosi u Preduzeću;
 - d) pravilnik.
- (2) Tumačenje općih akata daje organ koji je opći akt donio.
- (3) Opći akti Preduzeća se objavljuju na način određen statutom Preduzeća.

Član 28

(Statut)

- (1) Statut Preduzeća je osnovni opći akt Preduzeća.
- (2) Opći akti niže pravne snage od statuta Preduzeća, moraju biti usklađeni sa statutom.
- (3) Statut donosi upravni odbor Preduzeća, uz saglasnost Skupštine Distrikta.

Član 29

(Ostali akti)

Pored općih akata iz člana 27 ove odluke, Preduzeće može donositi i druge akte, koji moraju biti usklađeni sa statutom.

GLAVA XI. OSTALA PRAVA I OBAVEZE

Član 30

(Prava i obaveze Preduzeća i osnivača)

- (1) Preduzeće za svoje obaveze odgovara cjelokupnom svojom imovinom.
- (2) Preduzeće ima pravo da u pravnom prometu zaključuje ugovore, donosi akte i vrši druge poslove i radnje u okviru pravne sposobnosti Preduzeća.
- (3) U pravnom prometu Preduzeće je obavezno da se pridržava zakona i drugih propisa, koje donose nadležni organi.
- (4) Osnivač odgovara za obaveze Preduzeća do visine svog uloga.

Član 31

(Raspologanje novčanim sredstvima)

Posebnim aktom upravnog odbora Preduzeća određuju se lica ovlaštena za raspolaganje novčanim sredstvima Preduzeća i način raspolaganja novčanim sredstvima.

Član 32

(Poslovni i finansijski planovi i upravni akti)

(1) Preduzeće usklađuje razvojnu i poslovnu politiku Preduzeća, kao i finansijske planove s izvorima finansiranja djelatnosti Preduzeća, uz podršku nadležnog odjeljenja Vlade Distrikta, prije nego što ih usvoji Skupština Distrikta.

(2) Učestvovanje Preduzeća u realizaciji projekata koji se finansiraju iz kapitalnog budžeta Distrikta reguliše se posebnim aktom gradonačelnika Distrikta.

Član 33

(Svojstvo pravnog lica)

Preduzeće stiče svojstvo pravnog lica upisom osnivanja Preduzeća u sudski registar.

Član 34

(Javnost rada)

Rad Preduzeća je javan.

DIO TREĆI – ZAVRŠNE ODREDBE

Član 35

(Donošenje općih akata)

Opće akte Preduzeća donosi nadležni organ Preduzeća u roku od 90 dana od dana upisa osnivanja Preduzeća u sudski registar, ako drugačije nije propisano zakonom ili ovom odlukom.

Član 36

(Izmjene osnivačkog akta)

Izmjene i dopune ove odluke vrše se na način i prema postupku koji je predviđen za njeno donošenje.

Član 37

(Vršilac dužnosti direktora)

(1) U postupku upisa osnivanja Preduzeća u sudski registar, Preduzeće zastupa vršilac dužnosti direktora Preduzeća, koga imenuje Skupština Distrikta.

(2) Vršilac dužnosti direktora Preduzeća se imenuje u roku od 30 dana od dana osnivanja Preduzeća.

Član 38

(Primjena propisa)

Na odnose koji nisu regulisani ovom odlukom, a koji proisteknu prilikom njene primjene, primjenjuju se odgovarajuće odredbe zakona i drugih propisa koji uređuju tu materiju.

Član 39

(Ostale odredbe)

Ova odluka je sačinjena u četiri istovjetna primjerka od kojih svaki primjerak, koji je potpisan i ovjeren na propisan način, ima značaj originala.

Član 40

(Stupanje na snagu)

Ova odluka stupa na snagu danom donošenja i objavit će se u «Službenom glasniku Brčko distrikta BiH».

Broj: 0-02-022-81/07
Brčko, 26. juna 2007. godine

PREDSJEDNIK
SKUPŠTINE BRČKO DISTRIKTA BiH
Prof. dr. Milan Tomić, s.r.